



Inatsisartunut ilaasortaq  
Malik Berthelsen  
-/maani

**Inatsisartunut ilaasortap Malik Berthelsenip, § 36 stk. 1 naapertorlugu apeqqutaanut akissut.**

**Imerniartarfinni pujortaqquasiunnaarnerup Naalakkersuisunit qaqugu naliliiffiqineqarnissaa pillugu apeqqut**

Inatsisartunut ilaasortaq apeqquteqarneranut qutsavigaara.

Apeqqutit ukuupput:

- **Paaserusuppara imerniartarfinni pujortaqquasiunnaarnerup kingunissaa piffissaq qanoq sivisutigisoq ingerlareerpat iluaqutaanerani Naalakkersuisunit naliliiniarnerisut?**
- **Pujortartarnermut tunngasumik pinaveersaartitsinermik qaqugu Inatsisartunut siunnersuuteqaqqissinnaalissaagut?**

Apeqqutini tunngavilersuutigineqarpoq Peqqissutsimut Naalakkersuisoq oqariartuuteqarsimasoq pujortartarnermut pinaveersaartitinermik allanik misiliitinnani inatsisip qanoq sunniuteqarnera takoqqaarusullugu. Tamanna eqqunngilaq.

Pujortartarnerup peqqissutsimut ajoqutaalluinnartuuvooq, pujortartarnerlu nunatsinni kræftilersarnerit amerlanersaannut, uummatikkut taqqatigullu napparsimalersarnerit amerlanersaannut aammalu puatsigut nappaateqalersarnerit amerlanersaannut peqqutaavoq. Sassaallerfinni pujortartoqarnissaanik inerteqquteqarneq pillugu inatsit nutaaq tassaa-voq pujortarnerveersaartitsiniarluni suliniutit ilamininnguat. Inatsimmi immikkut angunia-gaavoq innuttaasut pujortartartuunngitsut putsumit eqqugaannginnissaat, naak nammin-neq pujortartanngikkaluarlutik putsumik najuussueqataasannginnissaat matumani anguniarneqarluni.

Pujortartarnerup tungaatigut pinaveersaartitsiniuterpaaluit maannakkut ingerlanneqarput. Pujortartarnerup Inuunerittami sammisassatut pingaartut inissisimavoq (Innuttaasut peqqissuunissaanik suliniut). Pujortartarnerup annikillisarnerilugu Paarisap suliniutaasa ingerlaavartut ilaat tassaapput pujortarunnaarnissamut siunnersuisartussanik pikkorissaanerit, atuaqatigiit pujortartanngitsut ukiumoortumik unammisinneqartarnerat, tupa akiorniarlugu WHO-p ullorititaanik malunnartitsiniartarnerup, pujortartarnerup navianassusia pillugu raatiukkut qaammarsaanerit aammalu pujortartarunnaarniartunik raatiukkut pikkorissaasarerit. Taakku saniatigut pujortartarnerup pillugu qaammarsaanerit atortut ataavartumik nutarterneqartarput, taakkulu piumasunit tamanit piniarneqarsinnaapput.

28. juni 2010  
Sagsnr. 2010-032605  
Dok. Nr. 397602

Postboks 1160  
Tlf: 34 50 00  
Fax: 32 55 05  
3900 Nuuk  
Email: pn@nanoq.gl  
www.nanoq.gl

Pingaaruteqarpoq pujortartarnermut tunngatillugu pinaveersaartitsiniarnermi iliuusissat ilisimasaniq tunngaveqarnissaat piffissamullu ungasinnerusumut sunniuteqarnissaat. Aammattaaq pingaaruteqarpoq iliuusissatut aallartinneqartut malinnaavigineqarnissaat kissaatigineqartumik sunniuteqarnersut paasiniarlugu. Taamaattumik Paarisa ingerlaavartumik naliliisassaaq pisariaqassappallu pinaveersaartitsineri iliuutsit allanngortittarlugit.

Peqqissutsimut Naalakkersuisoqarfiup inatsisiliarineqartup atuutilerneraniit ukiut 2-3 qaangiunneranni naliliinissani naatsorsuutigaa. Naliliineq taanna inatsisip kinguneraniq pujortartartut ikinnerulersimanersut, tupamik atuinerup appararsimanera il.il. takutitsisinaassasoq naatsorsuutigineqarpoq.

Inatsisip sunniutai allat aatsaat ukiorpaaluit qaangiunneranni uppersarsineqarsinnaalerumaarput. Taakkununga ilaapput assersuutigalugu nappaatit, soorlu pujortarneq peqqutigalugu kræftilersarneq, uummatikkut puatsigullu nappaatit.

Inatsit pujortartarneq pillugu iliuuserpassuit ilaannarimmassuk iliuutsinut allanut naleqqiullugu inatsisip sunniutai immikkoortikkuminaassinnaapput. Naatsorsuutigaarali inatsit pitsaasunik malitseqarumaartoq nunatsinnilu pujortartarnerup kingunerisaanik nappaataasartut ikilisissinnaagai inuiaqatigiinnilu tupamik atuineq tamarmiuseroq annikillissassaa.

Inatsisartut pujortartarneq pillugu inatsisissaniq nutaanik sukkulluunniit siunnersuuteqarsinnaapput. Oqaatigineqassaaq pujortarnermik inerteqquteqarneq pillugu inatsit sulii atuutilersimanngimmat, atuutilissallunilu 1. oktober 2010.

Inussiarnersumik inuulluaqqusillunga

Agathe Fontain